

SOLENITÂT DE SANTISSIME TRINITÂT

Jutoris pe Liturgjie

Domenie, ai 11 di Jugn dal 2017

Te glesie mari di Aquilee cheste solenitât e vignive ponude a la fin dal an liturgjic come coronament dal misteri di Diu parcè che dut al ven di lui, al sta sù in fuarce di lui e dut al va vies di lui. A lui la glorie tai secui. Amen (Rm 11, 36). Invezit te liturgjie romane la Ss. Trinitât che o stin fasint e ven metude a conclusion de storie de salvece che dal Avent a lis Pentecostis o vin celebrât in Crist. Di fat, te vite concrete dal fari (Mc 6, 3) di Nazaret o podìn viodi cui nestris vôi e in cualchi maniere cognossi il Diu invisibil che si è rivelât tune donazion di amôr. Come che al è scrit tal vanzeli di vuê: Diu i à volût tant di chel ben al mont, che al à dât so Fi, l'unigjenit.

Se Diu al è misteri infinît, no podìn pratindi di capi il so misteri. Nus baste dome olmâ, ancje midiant de liturgjie, la strade juste che e condûs a Lui: te persone e vite di Crist.

Di fat, cu la nestre inteligjence e sience o laressin pôc o nuie indevant, parcè che, al dîs s. Pauli: Ce che voli nol à mai viodût e orele sintût, e nol è mai jentrât tal cûr di un om, chest lu à preparât Diu par chei che i vulin ben (1 Cor 2, 9).

Al è clâr che l'amôr de Sante Trinitât al è spieli e fonde dal amôr che o vin di vê fra di nô. Al sarès inutil predicjâ l'amôr di Diu, se no lu metìn in pratiche tai riguarts dal prossim e dal nestri popul.

Antifone di jentrade

Benedet Diu Pari,
e l'unigjenit Fi di Diu
e il Spirtu Sant:
parcè che grant al è stât il so boncûr par nô.

Si dîs Glorie a Diu.

Colete

Diu, che mandant tal mont
il Verbo di veretât e il Spirt di santitât
tu âs rivelât ai oms il to misteri maraveôs,
danus la gracie che, professant la vere fede,
o podìn ricognossi la glorie de eterne Trinitât
e adorâ l'Unitât te potence de maiestât.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Es 34,4-6.8-9

Signôr, Signôr, Diu bon cence fin.

O sin tal desert dal Sinai (secul XIII p. d. C.) parcè che al sarà dificil cjatâ il Signôr tes confusions des placis; tra la fan e la sêt, parcè che: cui si impensial di Diu te massepassuderie?

Te antichitât lis divinitâts a jerin vuerîrs e a condusevin i esercits dal cîl e de tiere, ma a Mosè si palesà un Diu gnûf, un Diu bon cence fin, ch'al stente a inrabiâsi e ch'al è plen di boncûr e fedêl. Devant di un Diu di amôr nol reste che compuartâsi come Mosè: si inzenoglà svelt e si butà cul cjâf par tiere. E o vin di domandâ par nô e pe nestre int che il Signôr al vegni vie cun nô, seben che chest popul al à il cjâf dûr.

Dal libri dal Esodo

In chei dîs, Mosè, jevât denant di, al le su la mont dal Sinai, come che i veve ordenât il Signôr, e al cjapà te sô man lis dôs lastris di piere.

Il Signôr al vigni jù intun nûl e si fermà cun lui. Al clamà il non dal Signôr. Il Signôr al passà denant di lui e al berlà: «Il Signôr, il Signôr, Diu bon cence fin, ch'al stente a inrabiâsi e ch'al è plen di boncûr e fedêl, ch'al manten il so bonvolê cun miârs di lôr, ch'al sapuarte i fai, la tristerie e il pecjât ma che nol lasse che nissun no le fasi francje e al cjastie i pecjâts dai paris sui fîs e sui nevôts, fint a la tierce e a la cuarte gjenerazion!».

Mosè si inzenoglà svelt e si butà cul cjâf par tiere. Po al disè: «Se propit tu mi âs agrât, Signôr, che il gno Signôr al vegni vie cun nô, seben che chest popul al à il cjâf dâr; perdone la nestre tristerie e i nestrîs pecjâts e fâs di nô la tô ereditât».

Peraule di Diu.

SALM RESPONSORIÂL

Dn 3,52-56

Il libri di Denêl nus conte di trê zovins che a laudavin Diu adiriture tal mieç dal fûc di une fornâs. Il fat si cjatilu in Dn 3, 1-97.

La liturgjie nus invade a laudâ il Signôr, Diu bon cence fin, cu lis lôr stessis peraulis.

R. A ti la laut e la glorie tai secui.

Se cjantât,: Il cjant dai salms responsoriâi, p.87.

Benedet sêstu, Signôr, Diu dai nestrîs paris. **R.**

Benedet il to non sant e plen di glorie. **R.**

Benedet sêstu tal to templi sant e plen di glorie. **R.**

Benedet sêstu su la sente dal to ream. **R.**

Benedet sêstu tu, che tu stazis i abîs

e che tu sês sentât parsore dai cherubîns. **R.**

Benedet sêstu te volte dal cîl. **R.**

SECONDE LETURE

2 Cor 13,11-13

La gracie di Gjesù Crist, l'amôr di Diu e la comunion dal Spirtu Sant.

Nissun al pues jentrâ tal segret di amôr di une famê, li che unitât e diviersitât, fedeltât e libertât, afiet donât e sacrifici che al done a son il sfuarç, la gjonde e la utopie di ogni dî. Propit la famee e je il simbul plui biel di ce che nô o clamìn "unitât e trinitât di Diu"; la famê e je une piçule olme de Ss. Trinitât che cul o cjatìn nomenade come: La gracie dal Signôr - l'amôr di Diu - e la comunion dal Spirtu Sant. L'Apuestul al zonte: chest - chescj amôrs di Diu ch'a sedin cun ducj vualtris.

De seconde letare di san Pauli apuestul ai Corints

Fradis, stait contents, smicjait a la perfezion, fasêtsi fuarts un cul altri, lait d'acuardi, vivêt in pâs. E il Diu dal amôr e de pâs al sarà cun vualtris. Saludaitsi un cul altri cuntune sante bussade. Us saludin ducj i sants. La gracie dal Signôr Gjesù Crist, l'amôr di Diu e la comunion dal Spirtu Sant ch'a sedin cun ducj vualtris.

Peraule di Diu.

CJANT AL VANZELI

cf. Ap 1,8

R. Aleluia, aleluia.

Glorie al Pari, al Fi, al Spirtu Sant:
a Diu ch'al è, ch'al jere e ch'al ven.

R. Aleluia.

VANZELI

Zn 3,16-18

Diu al à mandât so Fi par che il mont al sedi salvât midiant di lui.

Nô o savèn che Nicodem al è lâ a cjatâ Gjesù di gnot e che dentri di lui al jere gnot. Ce varaial capît, lui, ebreu e monoteist radicâl, cuant che Gjesù i spiegà: Diu i à volût tant di chel ben al mont, che al à dât so Fi, l'unigjenit? Epûr alc al scuèn vê rumiât, se o tornìn a cjatâ Nicodem tun moment di grande dificoltât di Gjesù e te sepulture di Vinars sant (Zn 7, 50-51; 19, 39).

Cussì al è ancje di nô: ce podìno capî de sante Trinitât?

Tal misteri di Diu e soregut te gnot de vite, imparìn di Nicodem e anìn a fâsi istruî di Gjesù: ancje parcè che l'Evangelist nus vise: Diu nissun no lu à mai viodût. L'unigjenit Diu, che al è tal grim dal Pari, Gjesù, propit lui nus al à pandût. (Cfr. Zn 1, 18).

Dal vanzeli seont Zuan

In chê volte, Gjesù i disè a Nicodem: «Diu i à volût tant di chel ben al mont, che al à dât so Fi, l'unigjenit, par che ducj chei ch'a crodin in lui no perissin ma a vedin la vite eterne. Di fat Diu nol à mandât so Fi tal mont par condanâ il mont, ma par che il mont al sedi salvât midiant di lui. Chel ch'al crôt in lui nol ven condanât; chel che nol crôt in lui al è za condanât, parcè che nol à crodût tal non dal Fi unigjenit di Diu».

Peraule dal Signôr.

Si dîs O crôt.

Su lis ufiertis

Santifiche, Signôr nestri Diu,
pe invocazion dal to non chescj regâi de nestre suditançe
e midiant di lôr fasinus diventâ ancje nô une ufierte eterne.
Par Crist nestri Signôr.

Antifone a la comunion

Ga 4,6

Dal moment ch'o sês fîs,
Diu al à mandât il Spirt di so Fi tai vuestris cûrs,
Spirt ch'al berle: Abà, Pari.

Daspò de comunion

Ch'a zovin, Signôr nestri Diu,
pe salût dal cuarp e da l'anime,
chest sacrament ch'o vin ricevût,
e la profession de nestre fede te eterne Trinitât
e te sô indivisibil Unitât.
Par Crist nestri Signôr.

* * *

Riflession di pre Antoni Beline: Unîts te diversitât e diviers te unitât

E je une usance vielonone di dedicâ une fieste a la contemplazion e a la glorificazion dal misteri de Trinitât, venastâi di Diu tal misteri de sô vite intime, dopo di vê celebrade e meditate la sô glorie tes grandis voris ch'al à fatis.....

Vanseli par un popul, an A, p. 115

* * *

Cjants pe solenitât de Ss. Trinitât

Te lodiamo Trinità, n. 169;

Laut al Signôr, n. 189;

Lodate Dio schiere beate del cielo, n. 191;
Tu sei la mis vita, n. 192;
Tu sês la mê vite, n. 193;
Se mi vuoi seguire, n. 194.

Cjantade dai trê zovins, n. 293;
Cantico di Daniele, n. 299.

* * *

La relazione feconda della coppia diventa una immagine per scoprire e descrivere il mistero di Dio, fondamentale nella visione cristiana della Trinità che contempla in Dio il Padre il Figlio e lo Spirito d'amore. Il Dio Trinità è comunione d'amore e la famiglia è il suo riflesso vivente.

Pape Francesc, Amoris laetitia, n.11.

* * *

Joibe 15 o fasìn la memorie di san Proto, martar, copât sot l'imperadôr Dioclezian tal an 303 e sapulît inte localitât clamade S. Canzian. Li di fat si cjate un sarcofago cu la iscrizion "Beatissimo martyri Proto". Al è stât mestri dai trê sants Canzio, Canzian e Canzianile.

San Proto al è rapresentât ancje tai mosaics di S. Apollinare nuovo a Ravene fra i martars de parêt diestre.

Inte memorie gloriose dal martar Proto, ch'al à cjapade la corone eterne che Diu al à imprometude a di chei che i vuelin ben, ancje nô o preìn cun dute umiltât di rivâ, cul so jutori, a vê part a la gjonde dal cîl. Par Crist nestri Signôr. Amen.

dal Messâl roman par furlan

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*